

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10), na prijedlog Ministarstva za obrazovanje, nauku, kulturu i sport, Vlada Zeničko-dobojskog kantona, na 128. sjednici, održanoj dana 04.11.2021. godine, d o n o s i

ZAKLJUČAK

I.

Daje se saglasnost na tekst Urgencije Vlade Zeničko-dobojskog kantona u skladu sa usvojenim Zaključkom Vlade Federacije Bosne i Hercegovine a vezano za implementaciju Dodatnog finansiranja projekta „Energetska efikasnost u BiH“ i pravne posljedice implementacije Zaključka V. broj 1136/2021 od 15.07.2021. godine, koji čini sastavni dio ovog zaključka.

II.

Zaključak stupa na snagu danom donošenja.

PREMIJER

Mirnes Bašić

Broj: 02-_____/21
Datum, 04.11.2021. godine
Zenica

DOSTAVLJENO:

1x Ministarstvo za obrazovanje, nauku, kulturu i sport,
1x Ministarstvo finansija,
1x a/a.

Broj:

Zenica, 02.11.2021. godine

Vlada Federacije Bosne i Hercegovine
Hamdije Čemerlića 2, 71 000 Sarajevo
n/r Fadil Novalić, premijer

PREDMET: Urgencija u skladu sa usvojenim Zaključkom Vlade F BiH vezano za implementaciju Dodatnog finansiranja projekta "Energetska efikasnost u BiH" i pravne posljedice implementacije Zaključka V. broj 1136/2021 od 15.07.2021. godine, dostavlja se

Poštovani,

Vlada Federacije Bosne i Hercegovine (u daljem tekstu: Vlada F BiH) donijela je Zaključak V. broj 1136/2021 od 15.07.2021. godine u okviru razmatranja Informacije o utrošku sredstava u 2020. godini kojom su finansirani projekti uključeni u Program javnih investicija Federacije Bosne i Hercegovine 2020.-2022. godine. Ovim zaključkom resorna ministarstva i organi uprave koji implementiraju projekte zaduženi su da sredstva za troškove upravljanja projektima i sredstva od povrata PDV-a planiraju u budžetu Federacije Bosne i Hercegovine, te su, uz Federalno ministarstvo finansija, zaduženi i da u roku od 30 dana od dana stupanja na snagu Budžeta Federacije Bosne i Hercegovine za 2022. godinu zatvore projektne račune izvan Jedinog računa trezora i izvrše prenos raspoloživih sredstava na Jedinog račun trezora. Vlada Zeničko-Dobojskog Kantona se potpisivanjem Subsidijarnog sporazuma o kreditnom zaduženju zadužila kod Vlade Federacije BiH za implementaciju mjera energetske efikasnosti na 28 objekata, u okviru Dodatnog finansiranja projekta "Energetska efikasnost u BiH". Treba imati u vidu da su se sredstva povrata PDV-a iz komponente za kantone koristila za radove na objektima od značaja za kantone i raspoređivana su na kantone srazmjerno njihovom učešću u iskorištenim kreditnim sredstvima.

Implementacija zaključka Vlade dovela bi do situacije da kantoni koji su se zadužili kod Federacije neće ostvarivati pravo na korištenje srazmjernog dijela sredstava od povrata PDV-a, za koji vraćaju kamatu.

Jasno je već na prvi pogled da zaključak može imati duboke implikacije, kako sa stanovišta ugovornih obaveza Bosne i Hercegovine prema Međunarodnoj banci za obnovu i razvoj, tako i sa stanovišta opstojnosti samog projekta i realizacije ugovornih obaveza.

Treba napomenuti da su već potpisana četiri ugovora sa izvođačima radova i time su preuzete obaveze plaćanja, a pritom je dio sredstava planiran upravo iz sredstava povrata PDV-a. Dakle, ukidanje projektnog računa i prenos raspoloživih sredstava sa tog računa definitivno bi ugrozili projektnu aktivnost koja se odnosi na izvođenje građevinskih radova.

Konačno, ali ne manje važno, zaključkom Vlade i ovaj dio sredstava od povrata PDV-a za refinansiranje postaje više nego upitan, ne samo zato što takva sredstva na Jedinom računu trezora gube svoju identifikaciju i neposrednu vezu sa implementacijom projekta, nego i iz još jednog razloga: Odredbama člana 6. stav (3) Uputstva Uprave za indirektno-neizravno oporezivanje

BiH o odobravanju i izvršavanju povrata novčanih sredstava koji se evidentiraju u poreznom podsistemu elektronskim putem, izuzev povrata po PDV prijavi, propisano je:

„Član 6. stav (3) Budžetski korisnici koji su u sistemu trezora dužni su za potrebe povrata otvoriti račune posebnih namjena, odnosno račune bez odrednica polja javnih prihoda, koji će se dostavljati UINO.“

Tumačenjem citirane odredbe Uputstva, može se zaključiti da bi povrat PDV-a praktično bio onemogućen, obzirom da su bankovni računi u okviru Jedinog računa trezora uvijek određeni poljem javnih prihoda.

Ovim putem Vas obaviještavamo o posljedicama implementacije navedenog zaključka Vlade F BiH, u slučaju da Vlada Federacije postupi u skladu sa gore navedenim Zaključkom. **Vlada Zeničko-Dobojskog Kantona zahtijeva da koristi sredstva od povrata PDV-a u skladu sa kreditnim zaduženjem i kako je to do sada dogovoreno, jer se ipak radi o kreditnom zaduženju za koje Vlada Zeničko-Dobojskog Kantona vraća kamatu. Postupanje u skladu sa Zaključkom Vlade i planiranjem ovih sredstava u Budžet za 2022. godinu, dovelo bi do nemogućnosti implementacije mjera energetske efikasnosti na objektima sa prioritetne liste ZDK, te do nesagledivih pravnih posljedica.**

Kako bi se preduprijedile naprijed predočene pravne i druge posljedice implementacije zaključka Vlade, a u vezi sa kršenjem odredaba međunarodnog sporazuma i onemogućavanja, odnosno otežavanja realizacije projekta energetske efikasnosti, preporučujemo da se inicira ili predloži Vladi da donese zaključak kojim će staviti van snage Zaključak V. broj 1136/2021 od 15.07.2021. godine.

S poštovanjem,

P R E M I J E R

Mirnes Bašić

Dostavljeno:

1x Naslovu,

2x a/a.